

Ya libru nga nesúráat tu

Nehemia

1 Daya nakag-kagi kídi, ay mepanggap kadatu kinuw-kuwa tu Nehemia nga pútut tu Hacalia.

Tu nangikarárag tu Nehemia kadatu tolay

Ay kitu búlán na Kislev (mekasiyám nga búlán), kitu mekaduwa púlu dagun kitu panagturáy tu Ari Artaserses, ay uwad dà kitun kitu palásiyu ka Susa. ²Tu Hanani nga wagi ku, ay inumbet; kabbulun na datu lalláki nga iJuda. Dinámag ku kaggída nu mapaanna datu Judyu wa nakalásat kitu nangítalaw da kadatu duddúma nga bálud ka Babilonia, ay se dinámag ku pe nu mapaanna ngin tu íli Jerusalem. ³Ay nán da nga nesungbát, “Datu nakalásat, ay mapar-parigátan da tutu wala, ay se meap-appat da tutu wala pe kadatu tolay. Ay tu darupírip pa abut tu íli Jerusalem, ay rabba pikam panda kadedi, ay se nasidug datu ruwáangan na.”

⁴Ay kane magina ku tu kinagi da, ay nagtugaw wà a sumángit se nagpannakit, se nagnálin nà a nangán ka piga nga algaw, se yà nagkar-karárag ke Dios ka lángit. ⁵Ay nán ku wa nagkarárag, “O APU nga Dios ka lángit. Mannakabalin ka se nakas-kasdáaw ka nga Dios. Tung-tungpálan mu daya kar-kari mu, se akkan maul-ulis ya aminya mu kadaya maminya kikaw, se mangikur-kurug kadaya bil-bílin mu. ⁶Ay sinnan nà agpà se gínám ya karárag ku. Ay inalgaw se ginnabi yà a bobonam nga mangikar-karárag kadaya tolay mu wa iIsrael. Ay ipudnu ku wa kurug nagbásul kami nga iIsrael kikaw; iyà se datu apuapu mi. ⁷Nagbásul kami tutu wala kikaw ki akkan mi nangikur-kurug kadaya lin-lintag se bil-bílin mu se datu kinag-kagi mu wa nepekagi mu kitun kitu Moses nga bobonan mu. ⁸Lam-lamtan mu din tu nepekagi mu kitu Moses kitun nga, ‘Nu paglikudán dà, ay isip-siparà takayu kadaya duddúma nga il-íli. ⁹Ngamay nu magulli kayu kammin kiyà, ay se nu ikurug daya bil-bílin ku, ay alà takayu wa urnúngan kammin kiya íli nga piníli ku nga pagdayáwan nu kiyà, oray nu nippán dakayu kiya kadayyuwán na giyán

kídi kalawagán.’¹⁰ Asassu mu dedi nga tolay, se aggída daya píli mu wa tolay mu. Nesalákan muda gapu ki pannakabalin se turáy mu.¹¹ O Apu, ginám agpà ya karárag ku, se ya karárag daya bobonam nga sikkaanggam nga mangiday-dáyaw kikaw. Kuwaan mu agpà a napiya ya pagtungpálan naya igákat ku kiyá ári. Sápay kuma ta kalakkán nà.”

Kitun na tiyampu, ay iyà tu pára tog natu ári.

Tu nepappan tu Nehemia ka Jerusalem

2 Ay kitu búlán na Nisan (kitu munna nga búlán), kitu mekaduwa púlu dagun kitu panagturáy tu Ari Artaserses, ay tinogán ku tu ári. Ay kitun nala nga oras tu nakasingan na nga nalum-lomad dà.² Ay tútu nán tu ári kiyà, “Taanna, tura ka nalum-lomad? Ay akkan ka mà wayya nga magtakit. Nágan naya ilomad mu ta?” nán na kiyà. Ay tútu nagansing ngà tutu wala.³ Ay tútu nán ku summungbát, “Magnanáyun din ya ári! Kas anu wala nga di yà nalomad, ápu ári, ay narba tu íli nga netamnán datu apuapu ku. Nasidug ngámin pe datu gitap datu ruwángan na.”⁴ Ay tútu nán tu ári kiyà, “Nágan na lugud ya piyám nga màwa?” Ay tútu nagkarárag gà ke Dios ka lángit.⁵ Ay se ku la nán kitu ári, “Nu maanggamán ka kam kiyà, ápu ári, se nu ittu ya pagayatán mu, ay palubúsán nà kuma nga mawe ka Juda, kitu íli nga netamnán datu apuapu ku, ta senu mepolit ku kammin.⁶ Kataging natu ári tu atáwa na kitun. Ay nán na kiyà, “Makapiga ka lugud kannán, ay se nungay na ya aggulli mu?” Nayát tu ári nga magpapan kiyà. Ay tútu kinagi ku nu nungay na tu aggulli ku.⁷ Ay se ku pikam nán kitu ári, “Ay nu ittu ya pagayatán mu, ápu ári, ay pangwa nà agpà pe kada súrát nga idde ku kadatu gubernador kitu probinsiya ka dammáng wángag Eufrates, ta senu paliwánan dà ki ammeyag ku ka Juda.⁸ Ay se nu mabalín pe, ápu ári, ay magsúrát ka pe ke Asaf nga pakammuwan mu kitu sirát mu. Kagiyam nga iddán nà ka káyu wa usaran ku wa mangappiya kadatu gitap datu gagyángán natu aglingdán kitu giyán Templo, se pára ki darupírip pa abut tu íli, se pára ki balay nga pagyanán ku.” Nidde tu ári datu agngan ku, gapu ki kinamáru ne Dios kiyà.

⁹ Ay kane mawe yà in, ay pinabulun nà tu ári kadatu upisiyál datu suldádu na, se datu suldádu na nga nakakabalyu. Ay kane dumatang kami kitu probinsiya kitu dammáng na wángag Eufrates, ay nidde ku tu súrát tu ári kadatu gubernador.¹⁰ Ay kane magina de Sanballat nga iBet-Horon, se

tu Tobia nga upisiyál nga iAmmon, nga atán inumbet nga sumeng kadaya iIsrael, ay nakarungat da tutu wala.

Siningan tu Nehemia tu darupírip pa abut na Jerusalem

¹¹ Ay díkod dummatang ngà ka Jerusalem, ay tallu ngalgaw ku kitúni.

¹² Akkan ku nekag-kagi ki oray inna tu nepalammat ne Dios kiyà a kuwaan ku ki Jerusalem. Ay kitu isa nga gabi, ay lumawán nà; kabulun ku datu piga nga lalláki. Awan mi netug-túgut ta animál. Tittu tu nagtàyán ku wa inumbet. ¹³ Ay se kami nameyag kitu lalangkán kitu tanáp, se kami lumíwán kitu Gabbuwà Drágon, ay se kami dumatang kitu gagyangán na dad-dalenán na mangippà ki gamà. Ay se ku kinappiya nga siningan tu nadadál nga darupírip pa abut natu íli, se datu gitap datu lalangkán nga nasídug. ¹⁴ Ay se yà ala nawe kitu gagyangán na nengágan da ka Gagyangán Gabbuwà, se la kitu pisung nga agdidigútán tu ári; may áwan dalenan natu takay ku wa animál. ¹⁵ Ay díkod nagadámag gà a nanalen kitu tanáp se ku nawe siningan tu nadadál nga darupírip. Ay se yà ala nagulli kammin kitu dinalen ku nga nengágan da ka Lalangkán ki Tanáp. ¹⁶ Akkan am-ammu datu ù-upisiyál nu ka wàna tu napannán ku, se nu nágan na tu kuk-kuwaan ku. Akkan ku pikam kinag-kagi kadatu Judyu se kadatu pappádi, se kadatu ù-upisiyál se kadatu duddúma pikam ma mepagubra nu kuwa.

¹⁷ Ay se ku la nán kaggída, “Sinnan nu kod ya nakal-allà a napà-pàyanán tada. Nadadál ya íli tada nga Jerusalem, se nasídug daya gitap na lalangkán na. Ay túya kappiyánan tada kammin ya darupírip na, ta senu akkan tada ngin na nakap-appat.” ¹⁸ Ay kinagi ku kaggída ya kinamáru ne Dios kiyà, se ya isisseng na kiyà. Ay kinagi ku pe tu kinagi na ári kiyà. Ay tútu nán da, “Gayatán tada lugud din a nga kuwaan ya darupírip!” nán da. Ay díkod nagsagána da ngin nga mangigayát kitu ubra. ¹⁹ May kane magina tu Sanballat, se tu Tobia nga upisiyál datu iAmmon, se tu Geshem nga Arabo tu palánu mi, ay negal-galà dakami se dakami ug-ogan. Ay nán da, “Nágan naya lam-lamtan nu wa kuwaan ta? Magribilde kayu agkà ta, kiya ári?” ²⁰ Ay nán ku kaggída, “E Dios ka lángit ya sumeng kadakami, ta senu màwa mi ya palánu mi. Dakami nga magsir-sirbi kaggína, ay gayatán mi yin ya magubra. Ngamay nu dakayu, ay áwan nu wa ramaráman se áwan nu biy-biyáng kadaya mà-màwa kídi íli Jerusalem.”

Tu nangipolit da kammin kitu darupírip pa abut na Jerusalem

3 Ay se yala kinuwa kammin tu Eliashib nga nangátu wa pádi se datu kabbulun na nga pappádi tu Ruwáangan Karneru, ay se da nga nedidikár ke Dios, se da nippáy tu gitap na. Nedidikár da pe tu darupírip panda kitu Torre da Magatut, se panda kitu Torre Hananel. ² Ay datu tolay ka Jerico tu nagubra kitu sumarunu nga dissu, ay se yala tu Zaccur nga pútut tu Imri tu nagubra kitu sumarunu manin na dissu.

³ Ay datu pútupútut tu Hassenaa tu nangwa kitu Ruwáangan Sissida. Pinayán da ka gamba na se gitap na, se anulbàán na, se pasuwál na. ⁴ Ay tu Meremot nga pútut tu Uria nga apúku tu Hakkoz tu nangwa kitu sumarunu wa dissu natu darupírip pa abut. Ay se yala tu Meshullam nga pútut tu Berekia nga apúku tu Meshezabel tu nangwa kitu sumarunu nga dissu natu darupírip. Ay se la nga tu Zadok nga pútut tu Baana tu nangwa kitu sumarunu manin na dissu. ⁵ Ay se yala datu iTekoa tu nangwa kitu sumarunu nga dissu. Ngamay naddi nepagubra datu nasáad kaggída kitu paubra datu apu da.

⁶ Ay tu Joyada nga pútut tu Pasea, se tu Meshullam nga pútut tu Besodeya tu nangwa kitu Dadán Ruwáangan. Nippáy da tu gamba na, se tu gitap na, se anulbàán na, se tu pasuwál na. ⁷ Ay tu Melatia nga iGibeon, se tu Jadon nga iMeronot se datu iGibeon se iMizpa nga sakúpan tu gobernador kitu dammáng tu wángag Eufrates, tu nangwa kitu sumarunu wa dissu natu darupírip. ⁸ Ay tu nangwa kitu sumarunu nga dissu, ay tu Uzziel nga pútut tu Harhaya nga isa nga maragbattál ka balitù. Ay se yala nga tu Hanania nga maragkuwa ka bang-bangug tu nangwa kitu sumarunu nga dissu natu darupírip pa abut na Jerusalem panda kitu Nalawág ga Darupírip. ⁹ Ay se yala nga tu Refaya nga pútut tu Hur, nga apu ki isa nga distrítu naya probinsiya nga sakúpan naya Jerusalem, tu nangwa kitu sumarunu nga dissu natu darupírip. ¹⁰ Ay se yala nga tu Jedaya nga pútut tu Harumaf tu nangwa kitu darupírip kitu dammáng natu balay na. Ay se la nga tu Hattus nga pútut tu Hashabneya tu nangwa kitu sumarunu nga dissu natu darupírip. ¹¹ Ay tu Malkiya nga pútut tu Harim, se tu Hasshub nga pútut tu Pahat-moab tu nangwa kitu sumarunu wa dissu, se kitu Torre na Aglutuwán ka Sinápay. ¹² Ay tu Shallum nga pútut tu Hallohes se datu annánà na nga babbay tu nangwa kitu sumarunu wa dissu natu darupírip. Tu Shallum tu apu kitu gudduwa nga distrítu nga sákup na Jerusalem.

¹³ Ay tu Hanun se datu iZanoa tu nangwa kitu Ruwángan ka Tanáp. Pinayán da ka gitap na, se anulbàán na, se pasuwál na. Ay se da kinappiya pe tu 450 mitru nga darupírip tu abut panda kitu Ruwángan na Gamà.

¹⁴ Ay tu Malkiya nga apu ka Bet-hakkerem nga pútut tu Recab, tu nangappiya kitu Ruwángan na Gamà. Pinayán na pe ka gitap na, se anulbàán na, se pasuwál na.

¹⁵ Ay tu Shallum nga apu ka Mizpa, se pútut tu Col-hoze, tu nangappiya kitu Ruwángan na Gabbuwà. Pinayán na ka atap na se gitap na, se anulbàán na, se pasuwál na. Kinuwa na pe tu darupírip nga abut natu Agdidigútán ka Shela nga adanni kitu kamulán natu ári ka but-bútà, panda kitu giyán tu agdán nga mameyag kitu íli tu David. ¹⁶ Ay tu Nehemia nga apu ka Bet-zur nga pútut tu Azbuk, tu nangwa kitu dissu wa manggayát kitu panidmáng datu lúbù datu pamilya tu David se la dumatang kitu agdarnán da ka danum se kitu giyán natu kampu datu suldádu. ¹⁷ Ay datu sumarunu nga dissu natu darupírip pa abut, ay kinuwa datu Levita. Datun na Levita, ay tu Rehum nga pútut tu Bani, se yala sumarunu kaggína tu Hasabia nga apu natu gudduwa nga distrítu na Keila. Aggína tu nangwa kitu sumarunu nga dissu kitu distrítu na. ¹⁸ Ay tu sumarunu kaggína, ay datu páda na nga Levita: tu Binnui nga apu kitu gudduwa nga distrítu na Keila, nga pútut natu Henadad tu nangwa kitu sumarunu nga dissu. ¹⁹ Ay se yala tu Ezer nga apu ka Mizpa, nga pútut tu Jeshua. Aggína tu nangwa kitu dissu natu darupírip kitu panidmáng natu tutùduwán na mameyag kitu aggisiruán da kada armas kitu síku natu darupírip. ²⁰ Ay se yala sumarunu tu Baruc nga pútut tu Zabbai, manggayát kitu síku panda kitu gagyangán natu balay tu Eliashib nga nangátu wa pádi. ²¹ Ay se yala nga tu Meremot nga pútut tu Uria se apúku natu Hakkoz tu sumarunu kaggína. Aggína tu nangwa kitu dissu wa manggayát kitu gagyangán tu balay tu Eliashib panda kitu panda natu balay. ²² Ay se yala datu pappádi nga mag-agyán kitu lebut na Jerusalem tu nangwa kitu sumarunu nga dissu natu darupírip. ²³ Ay se yala tu Benjamin se tu Hasshub tu sumarunu kaggída. Aggída tu nangwa kitu darupírip kitu panidmáng datu babalay da. Ay se yala tu sumarunu kaggída, ay tu Azaria nga pútut tu Maaseya nga apúku natu Anania. Kinuwa na tu darupírip kitu bíkat natu balay na kampela ngin. ²⁴ Ay se yala sumarunu tu Binnui nga pútut natu Henadad. Kinuwa na tu dissu nga manggayát kitu balay tu Azaria panda kitu síku natu darupírip. ²⁵ Ay se yala tu Palal nga pútut natu Uzai, tu nangwa kitu

panidmáng natu síku se kitu torre kitu ngátu natu palásiyu nga adanni kitu pag-agyanán datu guwardiya. Ay tu sumarunu kaggína, ay tu Pedaya nga pútut tu Paros, ²⁶ se datu bobonan da ka Templo nga mag-agyán ka Ofel. Kinuwa da tu darupírip panda kitu panidmáng kitu Ruwáangan Danum, nga atán kitu pane lattakán. Kinuwa da pe tu torre nga nepalawlaw ki lasi. ²⁷ Ay se yala nga datu iTekoa tu sumarunu kaggína. Kinuwa datu darupírip kitu panidmáng natu torre nga nepalawlaw ki lasi panda kitu darupírip na Ofel.

²⁸ Ay datu pappádi tu nangwa kitu darupírip kitu ngátu natu Ruwáangan Kabalyu. Kinuwa natu isaisa kaggída tu bátug tu balay na kampela ngin nin. ²⁹ Ay se yala nga tu Zadok nga pútut tu Immer tu nangwa kitu darupírip kitu panidmáng natu balay na. Ay se yala tu Shemaya nga guwardiya kitu pane lattakán na ruwáangan, nga pútut tu Shecania tu nangwa kitu sumarunu wa dissu. ³⁰ Ay se yala nga sumarunu kaggína de Hanania nga pútut tu Shelemia, se tu Hanun nga mekannam nga laláki nga pútut tu Zalaf. Kinuwa da tu sumarunu nga dissu. Ay se yala tu Meshullam nga pútut tu Berekia tu nangwa kitu darupírip kitu bátug tu pag-agyanán na. ³¹ Ay se yala tu Malkiya, nga isa kadatu maragbattál ka balitù, tu sumarunu. Kinuwa na tu darupírip panda kitu giyán tu balay datu bobonan da ka Templo se datu maglà-láku, kitu panidmáng natu Ruwáangan na Agguurnúngán, se panda kitu adanni kitu paningátu wa kuwartu nga atán kitu síku natu darupírip pa abut. ³² Ay datu maragbattál ka balitù se datu maglà-láku tu nangwa kitu darupírip kitu nagbátán natu paningátu wa kuwartu se tu Ruwáangan Karneru.

Datu mangalúsaw kitu ubraan tu Nehemia

4 Ay kane madámag natu Sanballat nga kuwaan mi yin tu darupírip pa abut, ay nakarungat se nalúsaw tutu wala, ay se nakami ug-ogan nga Judyu. ² Ay nán na kitu àráng datu kabbulun na, se datu suldádu wa iSamaria, “Mangallakallà ala kurug dedi nga Judyu! Nágan na nád ya kuk-kuwaan da, 'kaw? Dálin da kid nu màwa da kammin ya darupírip ki tangalgaw wala nu magdátun da ka adu wa dátun! Wayya da ngala nga mapagbalin kammin ka napiya nga batu daya natumatumà se nasidug ga batu?” ³ Ay nán pe natu Tobia nga iAmmon nga kataging tu Sanballat, “Marba ngala a nga nán ku, ya darupírip nga kuwaan dayán, nu unean

na alsádu wa átu.” ⁴ Ay se yà a nagkarárag nga nán ku, “O Dios mi, ginán nakami. Sinnam kod ya angirupat da kadakami. Kuwaam nga aggída kammin ya kàwaán naya angirupat da kadakami. Mippan da din na bálud ka sabáli nga íli. ⁵ Akkan mu din pagdita ngala ya básul da. Akkan mu din pakawanan da ki básul da, ta nadakè tu kinag-kagi da panggap kikaw ki àráng daya magubra.”

⁶ Netúluy mi kammala tu nangwa kitu darupírip, ay nagudduwa ngin tu kalingúdu natu darupírip, ta nagpaggus tutu wala daya tolay nga nagubra.

⁷ Ay kane madámag de Sanballat, Tobia, se datu iArabia, se datu iAmmon se iAshdod nga tuluy-tuluy tu angwa mi kitu darupírip pa abut na Jerusalem, ay se nasultán nin datu biwáng natu abut, ay naturun tutu wala tu rungat da. ⁸ Ay tútu pinalánu da nga rautan ya Jerusalem nga mangrribù kadakami. ⁹ May nagkarárag kami ke Dios mi, se kami nangippáy ka guwardiya mi ki algaw se gabi.

¹⁰ Ay se la magríri yin datu iJuda nga nán da, “Magkapsut tin daya magakkát ka nadammat. Ay adu tutu wala ya rabba nga batu wa ulúdán mi. Ay túya akkan kami makapagubra kiya darupírip. ¹¹ Ay se la nán pikam daya kalínga mi, “Kattatán tada da, ay pilát da ngala nga atán tada ngin ki giyán da, se tada nga patayán da. Ay awan pe yin na ketúluy naya ubra da.”

¹² Ay datu Judyu wa mag-agyán kitu adanni kitu giyán datu kalínga mi, ay namin-adu da nga kinagi kadakami tu palánu da nga magtatammu datu kalínga mi se da la nga mangraut kadakami. ¹³ Ay díkod pinaguwardiyaán ku tu panibaw wa pane ka ruwár kitu abut kadatu maggiindù kammin. Niddán kuda ka armas da nga ampiláng, say-áng, se bútag. ¹⁴ Ay kane kappiyánan ku lam-lamtan tu kà-kàwaán da, ay nán ku kadatu ap-apu, se kadatu upisiyál se kadatu tolay, “Akkan kayu magansing kadaya kalínga! Damdamman nu wa naturáy se mannakabalin nge Apu! Makigubát kayu pára kadaya induan nu, se daya annánà nu, daya attáwa nu se daya babalay nu.”

¹⁵ Ay kane mammuwán datu kalínga mi nga nammuwán mi tu palánu da, ay se sinipdán ne Dios tu panggap da, ay netul-túluy mi tu nagubra kitu darupírip. ¹⁶ Ay nanggayát kitun, tu kinuwa mi, ay ginudduwa mi datu tolay. Datu gudduwa, ay magubra da kitu darupírip, ay datu gudduwa, ay magguwardiya da nga sikkaarmas ka ampiláng, say-áng, bútag, kalátag, se atán takkab gútù da pe. Ay datu ap-apu mi, ay atán da kitu likud

datu ngámin na iJuda, ¹⁷ nga mangwa kitu darupírip. Ay datu pára úlud kadatu masápul da, ay sikkiikkam tu isa íma da ki armas da, tu isa íma da tu magubra. ¹⁸ Nakatàlikád ngámin datu magdarupírip kaggída nga magubra. Ay tu magik-ikkam kitu tarumpeta, ay atán kitu giyán ku. ¹⁹ Ay nán ku kadatu ù-upisiyál se kadatu ap-apu, se kadatu tolay, “Adaddu ya abut nga kuwaan tada, se naggaadayyu tada. ²⁰ Ay túya nu magina nu ya tarumpeta, ay umbet kayu ngámin kiya giyán na pakagínaán nu. Ya Dios tada ya makigubát pára kadåtada.”

²¹ Ay gumabi se magibattán kami nga magubra. Ay tu gudduwa kadakami ay magubra, may datu gudduwa, ay nakasay-áng da nga magguwardiya. ²² Ay kinagiyánan ku pe datu tolay se datu asassu da nga mag-agyán ka lasi na Jerusalem, nga magyán da ngala ka unag Jerusalem nu gabi, ta magguwardiya da, ay se dala nga magubra nu algaw. ²³ Ay díkod nakasagána kami peyang. Akkan nà tagge nagsuk-sukát se datu induan ku, se datu bobonan ku, se datu tolay, se datu guwardiya nga kabulun ku. Sikkaagtu kami ngámin ki armas mi oray nu mawe kami yala nga magsàdu.

Tu nangrisut tu Nehemia kitu ríri datu tolay

5 Ay se yala uwad ríri datu tolay se datu attáwa da kadatu páda da nga Judyu. ² Ata atán datu nagkuna nga, “Adu kami nga magkukobung, ay túya masápul mi pe ya adu wa kanan mi nga magbiyág.” ³ Ay atán pe datu nagkuna nga, “Nesalda mi yin daya tálun mi, se daya kaubásan mi, se daya balay mi, ta senu makagátang kami ka kanan mi kídí nga agguulát.” ⁴ Ay nán pe datu duddúma nga, “Ummútáng kami ngámin nin ka pagbáyad mi ki buis mi kadaya tálun se kaubásan mi. ⁵ Ay Judyu kami mà pe se daya annánà mi, nga páda da pe se daya annánà da. May mapílit kami nga pagasassuwan daya annánà mi kaggída. Ay neláku mi yin daya duddúma kadaya annánà mi nga babbay, ta áwan mi nga màwa, ta akkan mi kuwa ngin daya tálun se daya kaubásan mi.”

⁶ Ay kane magina ku tu ríri datu tolay, ay nakarungat tà tutu wala. ⁷ Kinapiya ku nga linam-lammat tu kàwaán da, ay se ku inamomanán datu ap-apu se datu upisiyál. Ay nán ku kaggída, “Tura nu pal-palakkan daya wawwági nu? Tura nu pagan-anaan ya útáng da kadakayu?” nán ku. Ay se ku wala inayabán datu ngámin tolay, ta senu makappiya datu ríri

da. ⁸ Ay nán ku kaggída, “Kuwaan tada ngámin ya mabaal tada, ta senu màpoli tada daya páda tada nga Judyu nga neláku da ya baggi da kadaya akkan Judyu. May kídi manin, mapilítan da manin na mangiláku ki baggi da kadakayu wa páda da nga Judyu.” Akkan nagun-úni datu ap-apu, ta áwan da makagi.

⁹ Ay se ku manin nán, “Akkan napiya ya kuk-kuwaan nu! Akkan nu rabbang kadi ya magansing kuma ke Dios, ta senu akkan ditta igal-galà daya kalínga tada? ¹⁰ Iyà pe se daya wawwági ku, ay pà-pautángan mi pe daya tolay ka pirà se makkán. Akkan tada ngin pagan-anaan daya ipaútáng tada kaggída. ¹¹ Masápul ipatulli nu kammin kídi yin daya tálun da, se kaubásan da; se ipatulli nu kammin pe daya kamulán da ka olíbo se daya babalay da. Ay ipatulli nu kammin pe kaggída daya sinigir nu wa an-anà daya inútáng da nga pirà, trígo, bási, se denu olíbo.” ¹² Ay nán da nga nesungbát, “Kuwaan mi ya nán mu. Ipatulli mi kammin daya inalà mi kadaya tolay, se akkan mi da ngin singiran.

Pinaayabán ku datu pappádi se kuda pinagsipata ki àráng datu ap-apu se datu upisiyál nga tungpálan da datu kari da. ¹³ Ay se ku la newagwág tu bádu ku, ay se ku la nán kaggída, “Ay daya akkan magtungpál kiya kari da, ay iwagwág pe ne Dios da din kadaya babalay da se kadaya kuw-kuwa da! Ay nán datu tolay nga nesungbát, “Amen,” ay se da nga dinay-dáyaw nge APU. Ay tinungpál kurug datu tolay tu kari da.

Tu kinaparon tu Nehemia

¹⁴ Ay kitu unag na sangapúlu se duwa dagun ku nga naggubernador ka Juda, nanggayát kitu mekaduwa púlu dagun kitu panagturáy tu Ari Artaserses panda kitu mekatallu púlu se duwa dagun, ay akkan mi inalà se daya induan ku daya akakkanan na pagrabngán mi kuma gapu ki kinagubernador ku. ¹⁵ Ay datu nunna nga naggubernador, ay pinarigátan da daya tolay. Inalà da kadatu tolay datu kanan da, se inuman da ki inalhaw. Ay atán pe tu gudduwa kílu nga silber nga sinigir da kadatu tolay. Ay oray datu bobonan da, ay nearát da pe nga namarígát kadatu tolay. May akkan ku kinuwa ya ummán kiyán, gapu ki aggansing ku ke Dios. ¹⁶ Nippáy ku ngámin ya kabailán ku kiya ubra kídi nga darupírip pa abut. Awan ku wa ginátang nga lusà. Ay nepagubra pe daya ngámin na bobonan ku. ¹⁷ Ay áwan ku wa inadang kadaya tolay, oray nu inalhaw ku

wa panganan daya magatut se limma púlu wa Judyu se daya ù-upisiyál da; malaksid pikam daya sangaíli ku wa gayát ka sabáli nga íli. ¹⁸ Inalgaw ya agparti mi ka isa nga báka, annam nga pinalùmag nga karneru onu kalding, se adu wa anù. Ay se káda mekasangapúlu wa algaw, ay magpenum mà; ay daggáy ya bási kiyán. Ay oray nu ummán kiyán, ay akkan ku inalà dayán na pagrabngán na gubernador, ta nadammat yán kada toláy. ¹⁹ Ay nán ku wa nagkarárag, “Damdamman mu agpà, O Dios daya ngámin na kinuw-kuwa ku pára kadedi nga toláy.”

Tu utad da kitu Nehemia

6 Ay nadámag de Sanballat, Tobia, se Geshem nga iArabia, se datu duddúma nga kalínga mi, nga nabalín mi yin tu darupírip nga abut; ay se áwan na ngin na biwáng. Tittu datu gitap datu ruwángan na datu akkan mi pikam nippáy. ² Ay tútu nepekagi de Sanballat se tu Geshem nga magsisíngan kami kanu kitu isa kadatu íli kitu tanáp ka Ono. May nán da ngala tun ta atán talikuwaan da nga nadakè kiyà. ³ Ay tútu nangibon nà ka mawe ka giyán da nga mangagi nga, “Napatag pà nang ya ubraan ku, ay túya akkan nà makalbet kiyán. Akkan ku mabalín na kuspan nala ya ubra ku, se yà mawe kiyán.” ⁴ Ay namimpát dà nga inayabán, may ittu kam ya sungbát ku. ⁵ Ay kitu mekalimma ngin, ay uwad súrát nga nepetulud tu Sanballat kitu isa nga bobonan na kiyà. ⁶ Ay tu idi tu nán na kitu súrát na: “Nadámag ku kadaya toláy kadaya il-íli, ay se ittu pe ya kagiyan ne Geshem kiyà, nga palánu nu kanu ya magribilde se daya pádam nga Judyu. Ittu ya gapu na nga kappiyánan nu ya darupírip nga abut na íli. Ay nadámag ku pe nga piyán mu kanu ya magbalín ka ári da. ⁷ Atán da kanu win daya inamomanán mu nga profeta nga mangipatugaw kikaw nga ári na Juda. Kurug gala nga madámag pe na ári ya mepanggap kídí. Ay túya umbet ka ta pagamomanán tada ya mepanggap kídí.” ⁸ Ay ittu idi pe ya sungbát ku kaggína, “Akkan kammala nga kur-kurug daya kag-kagiyam. Battál mu kampela dayán nin.” ⁹ Pappanansingan dakami kammala ngin nin, ta senu kuspan mi yin ya ubra mi. May nagkarárag gà ke Dios nga nán ku, “O Dios, iddán nà mán ka bílag ku kídí.”

¹⁰ Ay kitu namissán, ay nawe yà naggagáyam kitu Shemaya nga an-anà natu Delaya nga apúku natu Mehetabel, ta akkan mabalín na lumawán kitu balay na. Ay nán na kiyà, “Magsisíngan tada kitu Templo ne Dios, se tada

manggitap, ta umbet da nu gabi nga mamatay kikaw. ¹¹ May nán ku wa nesungbát, “Wayya ngà ala nga magtal-talaw kídi ta, ta magsirù à kadaya kalínga ku! Ay se kannán ku ya mawe ki unag na Templo nga mangigdù ki baggi ku? Maddi ya lumnà ki Templo.” ¹² Ay se ku la nga napanúnut nga akkan gáyám inamomanán ne Dios tu Shemaya. May kinagi na ngala tun, gapu ta pinasúsúan de Tobia se Sanballat. ¹³ Ay binayádan da ngala nga mamanansing kiyà, se mangiparut kiyà a magbásul, ta senu mapadásan nà, se dà a irupat da tolay. ¹⁴ Ay tútu nagkarárag gà a nán ku, “O Dios ku, akkam agpà kaligpanán daya nadakè a kuk-kuwaan de Tobia se Sanballat, ay ummán pe nge Noadia nga profeta se daya duddúma pikam ma profeta nga maman-panansing kiyà.”

Tu nekabalin tu darupírip pa abut

¹⁵ Ay díkod nabalin tu darupírip pa abut kitu mekaduwa púlu se limma kitu búlán na Elul; ay limma púlu se duwa ngalgaw mi nga inubra. ¹⁶ Ay kane madámag datu kalínga mi nga atán kitu lebut mi, nga nabalin mi yin tu darupírip, ay nabàla da tutu wala, se nagansing da, áta nammuwán da nga nàwa mi tu abut gapu ki nesisseng ne Dios kadakami. ¹⁷ Ay kadatun na al-algaw, ay nagsisinnúrát datu ù-upisiyál ka Juda se tu Tobia. ¹⁸ Ata adu kadatu iJuda tu nagsipata nga pumane kaggína, ay se gapu ta manúgáng natu Shecania nga pútut natu Ara. Ata tu pútut na nga Jehohanán, ay inatawán na tu babbalásang tu Meshullam nga pútut natu Berekia. ¹⁹ Ay kag-kagiyán da kiyà ya kinamáru tu Tobia, ay se kinagi da pe ngámin kaggína datu kinag-kagi ku. Ay pinan-panansing nà tu Tobia kadatu sur-súrát na kiyà.

7 Ay kane mabalin tu darupírip, ay se nippáy ngámin nin datu gitap datu ruwángan, se atán pe datu magguwardiya ngin, se datu napíli nga maragkansiyon, se niddán pe datu Levita kada ubra da, ² ay tu wagi ku nga Hanani, se tu Hanania nga apu datu magguwardiya kitu abut, datu pakammuwan ku kitu íli Jerusalem, ta mapiyár da, ay se ab-abay ya aggansing da ke Dios may datu kaduwán kaggída. ³ Ay nán ku kaggída, “Akkan nu lù-lùtán daya ruwángan panda ki katakit na sínág. Ay senu wala igitap se ipasuwál kammin nu masirbut ya mata, sakbay nga mabuwa daya guwardiya. Mangalà kayu kadaya iJerusalem nga magguwardiya.

Magguwardiya daya duddúma kiya giyán darupírip, ay daya duddúma, ay magguwardiya da kadaya babalay da.

Ya lista datu nagulli nga netálaw da kitun na bálud

(Ezra 2:1-70)

⁴Ay kitun, ay abay tu íli, may bittè pikam datu tolay kitúni, se áwan pikam pà nang pe nga babalay. ⁵Ay se yala nepalammát ne Dios kiyà nga urnúngan ku ngámin datu ap-apu, se datu ù-upisiyál, se datu tolay, ta senu merigistru da sigun kiya naggay-gayatán da. Nasmà ku tu libru wa nekesurátan na ngag-ngágan datu nun-unna nga nagulli. Tu idi nasingan ku wa nesúrát:

⁶Tu dedi datu tolay nga iJuda nga netálaw natu Ari Nebucadnezar, nga nebálud na ka Babilonia, nga nagulli kammin ka Jerusalem se kadatu il-íli da kampela ngin ka Juda. ⁷Tu dedi ya ngag-ngágan datu ap-apu da: Tu Zerubbabel, tu Jeshua, tu Nehemia, tu Azaria, tu Raamia, tu Nahamani, tu Mordecai, tu Bilshan, tu Misperet, tu Bigvai, tu Nehum, se tu Baana. ⁸Tu dedi daya ngag-ngágan datu apuapu da, se ya bíláng datu gakagaka da nga nagulli:

Datu gakagaka tu Paros, ay 2,172 da ngámin. ⁹Datu gakagaka tu Shefatia, ay 372 da. ¹⁰Ay datu gakagaka tu Ara, ay 652 da. ¹¹Ay datu gakagaka tu Pahat-moab nga gakagaka tu Jeshua se tu Joab, ay 2,818 da. ¹²Ay datu gakagaka tu Elam, ay 1,254 da. ¹³Ay datu gakagaka tu Zattu, ay 845 da. ¹⁴Ay datu gakagaka tu Zaccai, ay 760 da. ¹⁵Ay datu gakagaka tu Binnui, ay 648 da. ¹⁶Ay datu gakagaka tu Bebai, ay 628 da. ¹⁷Ay datu gakagaka tu Azgad, ay 2,322 da. ¹⁸Ay datu gakagaka tu Adonikam, ay 667 da. ¹⁹Ay datu gakagaka tu Bigvai, ay 2,067. ²⁰Ay datu gakagaka tu Adin, ay 655 da. ²¹Ay datu gakagaka tu Ater nga nagnágan pe ka Hezekia, ay 98 da. ²²Ay datu gakagaka tu Hashum, ay 328 da. ²³Ay datu gakagaka tu Bezai, ay 324 da. ²⁴Ay datu gakagaka tu Harif, ay 112 da. ²⁵Ay datu gakagaka tu Gibeon, ay 95 da. ²⁶Ay datu iBetlehem se iNetofa, ay 188 da ngámin. ²⁷Ay datu iAnatot, ay 128 da. ²⁸Ay datu iBet-azmavet, ay 42 da. ²⁹Ay datu iKiriath-jearim, iKefira se iBeerot, ay 743 da ngámin. ³⁰Ay datu iRama se iGeba, ay 621 da ngámin. ³¹Ay datu iMicmas, ay 122 da. ³²Ay datu iBetel se iAi, ay 123 da. ³³Ay datu iNebo, ay 52 da. ³⁴Ay datu gakagaka tu isa nga Elam, ay 1,254 da. ³⁵Ay datu iHarim, ay

320 da ngámin. ³⁶ Ay datu iJerico, ay 345 da. ³⁷ Ay datu iLod, iHadid, se iOno, ay 721 da ngámin. ³⁸ Ay datu iSenaa, ay 3,930 da.

³⁹ Tu idi ya listáan datu pappádi nga nagulli:

Datu gakagaka tu Jedaya nga pútupútut tu Jeshua, ay 973 da. ⁴⁰ Ay datu gakagaka tu Immer, ay 1,052 da. ⁴¹ Ay datu gakagaka tu Pashur, ay 1,247 da. ⁴² Ay datu gakagaka tu Harim, ay 1,017 da.

⁴³ Tu idi ya lista datu Levita nga nebálud kitun nga nagulli ka Juda:

Datu gakagaka de Jeshua se tu Kadmiel nga gakagaka natu Hodavia, ay 74 da ngámin. ⁴⁴ Datu maragkansiyaon kitu Templo nga gakagaka tu Asaf, ay 148 da. ⁴⁵ Datu guwardiya kadatu gagyangán tu Templo nga pútupútut de Shallum, Ater, Talmon, Akkub, Hatita se tu Shobai, ay 138 ngámin.

⁴⁶ Ay tu dedi datu bobonan da kitu Templo nga netálaw wa bálud nga nagulli kammin:

Datu gakagaka tu Ziha, tu Hasufa, tu Tabbaot, ⁴⁷ tu Keros, tu Sia, tu Padon, ⁴⁸ tu Lebana, tu Hagaba, tu Shalmal, ⁴⁹ tu Hanan, tu Giddel, tu Gahar, ⁵⁰ tu Reaya, tu Rezin, tu Nekoda, ⁵¹ tu Gazzam, tu Uzza, tu Pasea, ⁵² tu Besai, tu Meunim, tu Nefushesim, ⁵³ tu Bakbuk, tu Hakufa, tu Harhur, ⁵⁴ tu Bazlit, tu Mehida, tu Harsha. ⁵⁵ tu Barkos, tu Sisera, tu Tema, ⁵⁶ tu Nezia, se tu Hatifa.

⁵⁷ Tu idi ya lista datu gakagaka datu asassu natu Ari Solomon:

Datu gakagaka tu Sotai, tu Soferet, tu Perida, ⁵⁸ tu Jaala, tu Darkon, tu Giddel, ⁵⁹ tu Shefatia, tu Hattil, tu Pokeret-hazzebaim, se tu Amon.

⁶⁰ Ya dágup datu ngámin na bobonan da kitu Templo se datu gakagaka datu bobonan tu Solomon, ay 392.

⁶¹ Ay uwad pe datu nagulli ka Jerusalem nga gayát kadatu íli Tel-mela. Tel-harsha, Kerub, Addon se Immer. Ngamay áwan da pakammuwán nu kurug ga iIsrael da. ⁶² Aggída datu gakagaka tu Delaya, tu Tobia, se Nekoda. Tu bílang da ngámin, ay 642.

⁶³ Uwad da pe datu nagulli nga pappádi nga gakagaka tu Hobaya, tu Hakkoz, se tu Barzillai. (Tu idi tu Barzillai nga inatawán na tu isa kadatu babbay nga pútut tu Barzillai nga iGilead. Ay nengágan da kitu ngágan tu katugángan na.) ⁶⁴ Gapu ta áwan datu ngag-ngágan da kitu lista natu naggay-gayatán da, ay akkan da nebílang nga kurug ga pappádi da. ⁶⁵ Ay akkan pe pinalubúsán natu gobernador da nga mepangán kadatu

akakkanan na nedátun ke Dios, panda ki kaatán na pádi nga mabalin mangammu ki uray ne Dios ki angngusár na ki Urim se Tummim.

⁶⁶Ya dágup ngámin datu tolay ya nagulli ka Juda, ay 42,360. ⁶⁷Ya dágup datu asassu wa babbay se lalláki ay 7,337. Ay ya dágup datu maragkansiyon na lalláki se babbay, ay 245. ⁶⁸Ay uwad netúgut da nga 736 nga kabalyu, se 245 nga molo, ⁶⁹435 nga kámel, se

6,720 nga asnu.

⁷⁰Ay adu pe kadatu apu na káda pamilya tu nangidde ka mausár pára kitu angipasíkad da kammin kitu Templo. Ay nangidde tu gobernador ka walu se gudduwa kílu nga balitù, limma púlu wa besin, se 530 nga ibbabádu da pappádi. ⁷¹Ay ya nidde datu duddúma nga ap-apu datu pam-pamilya, ay 170 kílu nga balitù, se 1,300 kílu nga silber. ⁷²Ay tu nidde datu duddúma pikam nga tolay, ay 150 kílu nga balitù, 1,200 kílu nga silber, se 67 nga ibbabádu da pappádi.

⁷³Ay díkod datu pappádi, se datu Levita, se datu guwardiya, se datu maragkansiyon, se datu bobonan da kitu Templo, se datu ngámin na iIsrael, ay nagyán da kadatu il-íli ka Juda.

Tu nangibása tu Ezra kitu lintag

8 Ay nagguurnung datu tolay kitu palása kitu unag natu Ruwáangan Danum. Ay se da nepilbet kitu Ezra nga maragtùgud kadatu lin-lintag tu libru wa nekesurátan datu lin-lintag ne APU nga nepidde na kitu Moses kadatu iIsrael. ²Ay díkod inalà tu Ezra nga pádi tu libru, se na nilbet kitu àràng datu tolay ya magguurnung. Atán pe datu annánà a makaaw-awat tin. Nàwa idi kitu munna nga algaw natu mekapittu búlán. ³Nebása na kadatu tolay kitúni palása tu lintag. Ginayatán na tu nangibása kitu pagbarngát panda kane mangalintutúgu. Ay nanggina ngámin datu tolay. ⁴Umunè se nagsíkad tu Ezra kitu kinuwa da nga isteds. Ay nepagsisíkad de Mattitia, Shema, Anaya, Uria, Hilkia se tu Maaseya kitu pane diwanán na. Ay nepagsisíkad pe de Pedaya, Mishael, Malkiya, Hashum, Has-baddana, Zacarias, se tu Meshullam kitu pane kasígid na. ⁵Ay masissingan ngámin datu tolay tu Ezra, ta alingúdu tu pagsisikádan na. Ay kane lùtán na tu libru, ay nagsíkad ngámin datu tolay. ⁶Ay nán tu Ezra, “Maday-dáyaw nge APU wa mannakabalin nga Dios!” Ay ngámin datu tolay, ay netáyag da datu íma da, se da summungbát nga nán da, “Amen! Amen!” Ay se da

nagukkab kitu lusà, se da dinay-dáyaw nge APU. ⁷ Ay se yala nagsíkád datu tolay kane ilaw-lawág datu Levita tu lintag kaggída. Datun na Levita, ay tu Jeshua, tu Bani, tu Sherebia, tu Jamin, tu Akkub, tu Shabbetai, tu Hodia, tu Maaseya, tu Kelita, tu Azaria, tu Jozabad, tu Hanan se tu Pelaya. ⁸ Nebása da tu atán kitu libru na lin-lintag ne Apu Dios, ay se da nelaw-lawág kadatu tolay tu piyán na kagiyan, ta senu maawátan da.

⁹ Ay kane magína datu tolay datu kag-kagiyan natu lintag, ay nagsasángit da. Ay tútu nán de Nehemia nga gobernador se Ezra nga pádi se maragtùgud ki lintag, se datu Levita kadatu tolay, “Akkan kayu magpannakit onu sumángit, ta idi nga algaw ay napatag ke APU nga Dios nu.” ¹⁰ Ay nán pikam tu Nehemia kaggída, “Magkakáwe kayu win kadaya babalay nu, se kayu wa magsilibrár; mangán kayu kadaya namit, se uminum kayu kadaya namit nga bási, ay se iddán nu daya áwan nesagána nga kanan se inuman. Ta napatag pà nang idi nga algaw pára ke Apu tada. Túya akkan kayu magpannakit, ta ya agganggam ma idde ne APU, ay ittu ya mamabílag kadakayu.” ¹¹ Ay se yala pinaginggap datu Levita datu tolay se da nán, “Akkan kayu win magpannakit, ta napatag idi na nga algaw.” ¹² Ay díkod, nagkakáwe datu tolay kadatu babalay da, se da magkakán se maggiinum, se mangibíngay kadatu akakkanan da, se maggan-gánas da, ta naawátan da datu nebása kaggída.

Tu Piyasta nga Angwa da ka Báwi

¹³ Ay kane kaláwa, ay nawe datu ap-apu datu pam-pamilya datu ngámin na tolay, se datu pappádi, se datu Levita ka giyán tu Ezra, nga magádal ka panggap kadatu kag-kagiyan natu lintag. ¹⁴ Ay nammuwán da nga uwad bílin ne APU kitu Moses nga mag-agyán datu iIsrael kada báwi da nu magpiyasta da kitu mekapittu wa búlán. ¹⁵ Ay se masápul la ipakammu da kadatu tolay kadatu ngámin na il-íli ka Jerusalem nga mawe da kadaya ban-bantay, se da maggalà ka pasanga káyu wa olíbo, banaba, palátang, se pasanga da nasagúngut nga káyu, ta kuwaan da ka báwi da, nga ummán ki nesúrát ki lintag. ¹⁶ Ay díkod nagkakápan datu tolay ya naggalà kadatun, ay se da nga nangwa ka báwi da. Nagbáwi datu duddúma kitu útun datu babalay da, ay datu duddúma, ay nagbáwi da kadatu amuwág da, ay uwad pe datu nagbáwi kitu amuwág na tu Templo ne Dios, se uwad pe datu nagbáwi kitu palása nga adanni kitu Ruwángan Danum, se

kitu palása nga adanni kitu Ruwángan Efraim. ¹⁷ Ay ngámin datu tolay nga nagulli nga gayát kitu nekabálud da ka Babilonia, ay nangwa da ka báwi da nga nagyanán da kitun na piyasta. Ay ittu tun tu nunna nga nagsilibrár datu iIsrael kitu Piyasta nga Angwa da ka Báwi, nanggayát kitu tiyampu natu Joshua nga pútut tu Nun. Ay naganggam tutu wala datu ngámin tolay. ¹⁸ Ay nanggayát kitu nunna nga algaw natu piyasta panda kitu nekabalin na, ay inalgaw tu Ezra nga nangibása kitu libru wa nekesurátan daya lin-lintag ne Dios. Ay kitu mekawalu nga algaw natu piyasta, ay nagguurnung da ngámin ka ammalin da kitun na piyasta, ta ittu tun tu nesúrat kitu lintag.

Tu nangipudnu datu tolay kadatu bas-básul da

9 Ay kitu mekaduwa púlu se appát ngalgaw natun kam nga búlán, ay nagguurnung datu iIsrael nga magngílin mangán, se magbádu ka langgusti, se da tinap-tapúrán ka tápù datu úlu da, ka angipassingan da kitu agpannakit da gapu kadatu bas-básul da. ² Ay se da nagsíkad da nangipudnu kadatu bas-básul da, se datu básul datu apuapu da. Napab-pabeg da kampela ngin nin na iIsrael. Awan ram-ráman datu agtangeli kitu kuwaan da. ³ Kaggída nga magsisíkad, ay moli kid tallu oras nga nebása kaggída datu lin-lintag ne APU nga Dios da, se tallu oras da pe nga nagipudnu kadatu bas-básul da, ay se da dinay-dáyaw nge APU nga Dios da. ⁴ Ay uwad datu Levita nga magsisíkad kadatu pákad agdán nga magkarárag ka naggat ke APU nga Dios da; de Jeshua datun, se tu Bani, tu Kadmiel, tu Shebania, tu Bunni, tu Sherebia, tu Bani se tu Kenani. ⁵ Ay tu dedi datu Levita nga nangiapu kadatu tolay nga magday-dáyaw ke Dios: tu Jeshua, tu Kadmiel, tu Bani, tu Hashabneya, tu Sherebia, tu Hodia, tu Shebania se tu Petahia. Ay nán da, “Magsíkad kayu se day-dayáwan nu we APU nga Dios nu, nga awiawe uwad din kitun kam se atán peyapeyang ka áwan panda. Day-dayáwan nu ya nadáyaw wa ngágan na! Napà-patag se nadáyaw nga adayyu may iya makagi tada nga agdáyaw kaggína.”

⁶ Ay nán tu Ezra,

“APU, ikaw wala ya sissa nga APU;

ikaw ya namarsuwa kiya ngámin lángit se daya
ngámin na bittuwan kiyán;

- ay ikaw pe ya namarsuwa kídi kalawagán se daya
 ngámin na atán kídi;
 ikaw ya namarsuwa kiya bebay se daya ngámin na atán kiyán.
 Ay ikaw ya nangidde ki biyág ngámin dayán.
 Ay ngámin daya ilángit, ay magday-dáyaw da kikaw.
- ⁷ Ay ikaw APU, ya Dios nga namíli kitu Abram,
 ay se mu netálaw ka Ur nga íli datu Caldeo,
 ay se mu pinangagánan ka Abraham.
- ⁸ Ay nasingan mu nga magpiyár peyang kikaw,
 ay túya nagkari ka kaggína,
 nga iddem kadaya pútupútut na ya lusà daya Cananeo,
 se lusà daya Heteo, se daya Amoreo,
 se lusà daya Perizeo, daya Jebuseo, se daya Girgaseo.
 Ay tinungpál mu kurug ya kari mu,
 gapu ta namáru ka nga Dios.
- ⁹ Nasingan mu tu nagrígát datu apuapu mi ka Egipto,
 ay se ginina mu tu nakiseng da, kane atán da kitu dappit
 natu Daggáng nga Bebay.
- ¹⁰ Ay nangipassingan ka ka nakas-kasdáaw
 kitu Faraon ka ammánis mu kaggína,
 se kadatu ù-upisiyál na, se kadatu ngámin tolay na,
 ta ammun tu namal-pallà da kadatu apuapu mi.
 Nepassingan mu ya kinadáyaw mu,
 ay nadáyaw ya ngágan mu panda kadedi nga al-algaw.
- ¹¹ Ay ki pagmar-marngán datu tolay mu,
 ay pinagtuway mu tu bebay.
 Ay tútu dumalákit da kitu bebay
 kitu namaga nga lusà!
 Ngamay linimat mu datu magappal kaggída;
 natan da ngala ki batu nga inumlad kitu magpalupalun na bebay.
- ¹² Ay kitu nagdal-dalen da ki algaw,
 ay uwad ummán ka adígi nga angap nga naginunna kaggída.
 Ay kitu nagdal-dalen da ki gabi,
 ay uwad ummán ka adígi nga apuy nga naginunna kaggída,
 nga ittu tu dílag da nga mawe kitu kapannán da.
- ¹³ Naganìgad ka ka bantay Sinai,

ay se muda inamomanán;
 ay se mu nidde kaggída daya ipasúrut mu kaggída,
 se daya ipàwa mu kaggída,
 se daya bil-bílin mu,
 se daya napiya nga lin-lintag mu.

¹⁴ Ay nepakammu mu kaggída ya algaw wa aggiimáng, ay se mu nepidde kitu Moses nga bobonan mu daya bil-bílin se daya lin-lintag mu.

¹⁵ Ay kane mabisinán da, ay niddán muda ka akakkanan nga gayát ka lángit. Ay kane mawwaw da, ay niddán muda ka danum nga naggayát kitu pínát. Ay se mu kinagi kaggída nga mawe da sakúpan se da maggunà kitu lusà a nesipata mu nga idde kaggída.

¹⁶ Ngamay nagpang-pangátu se nagsúkir datu apuapu mi, ay se akkan da nga kinur-kurug datu bil-bílin mu. ¹⁷ Naddi da nga manggina, ay se da kinaligpanán nin datu nakas-kasdáaw nga kinuw-kuwa mu pára kaggída. Nagsúkir da, ay se da namíli ka apu da nga mangiulli kaggída kitu pannakaasassu da ka Egipto. Ngamay marammakawan ka, se namáru ka, se maragkallà ka nga Dios, ay se akkan ka pe nalà-lapat malúsaw, se abay tutu wala ya amminya mu. Ay túya akkan muda pinagdudoray.

¹⁸ Nangwa da ka diy-diyos da nga sinan bak-baka, ay se da nán nga, ‘Tu idi na ya diyos tada nga nangitálaw kadátada ka Egipto!’ nán da. Nerupat daka tutu wala. ¹⁹ Ngamay gapu ta maragkallà ka tutu wala, ay akkan muda pinagdudoray yala kitun kitu ir-ir-er. Atán kammala tu ummán ka adígi nga angap nga naginunna kaggída ki algaw, se tu ummán ka adígi nga apuy nga dílag da ki gabi, nga nangiturung kaggída kitu kapannán da. ²⁰ Ay se mu nebon ya namáru wa ispiritum nga magtùgud kaggída. Ay akkan mu pe kinusap tu anngidde mu kaggída kitu akakkanan na mána. Niddán muda pe ka danum nga inuman da. ²¹ Ay ki unag na appát púlu dagun, ay nidde mu ngámin tu kasapúlán da kitu kakowad da kitu ir-ir-er, ay tútu akkan da nagkúrang kadatu kasapúlán da. Akkan nagdadán datu bad-bádu da, se áwan pe bingil nga nagbattu kitu akadal-dalen da.

²² Ay pinasákup mu kaggída daya pagariyán se daya nas-nasiyon, se daya katákip da nga il-íli. Sinákup da pe ya Hesbon na pagariyán tu Ari Sihon, se Bashan nga pagariyán tu Ari Og. ²³ Ay pinaadu mu tutu wala datu gakagaka da, nga ummán ki kaadu daya bittuwan, ay se muda nippan kitu lusà a nekari mu wa ipakin-kuwa kadatu apuapu da. ²⁴ Ay díkod nawe datu gakagaka da nga sinákup tu lusà. Ay kaggída nga mameyag, ay inábà

mu datu Cananeo se tu ári da, ay se muda nepeturayán kadatu tolay mu, ta senu kuwaan da tu piyán da nga kuwaan kaggída. ²⁵ Ay sinákup datu apuapu mi datu il-íli nga naabut ka darupírip, se datu nadam-ag ga lusà. Timpallán da pe datu babalay nga napnu ka nagbal-baláki nga sanikuwa, se atán nakorobán nin nga agdarnán ka danum, se da kaubásan, se da kamulán ka olíbo, se adu tutu wala nga káyu nga makkán tu búnga da. Ay díkod adu tutu wala tu kanan da, ay tútu mabtug da peyang, ay se lumùmag da. Naganggam da gapu ki kinamárum tutu wala kaggída.

²⁶ Ngamay nagribilde da mán kammin kikaw, se da akkan pinagan-anu daya bil-bílin mu. Ay pinatayán da datu profeta nga nebon mu wa mangag-kagi kaggída, ta senu magulli da kuma kammin kikaw. Nerup-rupat daka pe tutu wala. ²⁷ Ay ittu tu ipinaábà muda kadatu kalínga da, nga ittu datu namar-parígát kaggída. May kane makiseng da kikaw kitu agrig-rígát da, ay ginina muda. Ay gapu ki abay pànang nga agkallà mu, ay nangibon ka ka mawe mangisalákan kaggída kadatu kalínga da. ²⁸ Ngamay kane pumiya manin tu kabiy-biyág da, ay nagbásul da manin kikaw. Ay tútu binay-án muda manin na iturayán datu kalínga dada. May kane kinumraw da nga makiseng kikaw, ay ginina muda kiyán lángit. Namin-ad-adu muda nga nesalákan gapu ki agkallà mu. ²⁹ Ay kinagiyánan muda, ta senu ikurug da kammin daya lin-lintag mu. Ngamay nagpangátu se nagsúkir da mán kammin, ay se da sinuwáy datu bil-bílin mu, oray nu datun na bil-bílin mu ya makidde ka napiya nga biy-biyág da. May nagsúkir da se daka pinaglikudán, ay se akkan da ngin mangikur-kurug. ³⁰ Inan-anúsán muda ka nabayág ga dagudagun. Ay se ka nangibon kadatu profeta mu nga netur-turayán naya Ispiritum, ta senu kagiyánan dada, may maddi da manggìna. Ay tútu pinasákup muda kadatu tolay ka sabáli nga íli. ³¹ Ngamay gapu ki abay nga agkallà mu, ay akkan mu nepalúbus nga marápun da, se akkan muda nigsán tutu wala ngin.

³² “O Apu nga Dios mi, naturáy ka se mannakabalin se nakas-kasdáaw ka nga Dios. Tungpálan mu peyang daya kar-kari mu, se akkan maul-ulis ya aminya mu. Akkan nakami dín bay-bay-án nala kadaya kapar-parigátan nga inumbet kadakami se daya ári mi, se daya ap-apu mi, se daya pappádi mi, se daya profeta mi, se daya apuapu mi, se daya ngámin na tolay mu, nanggayát kitu nangitálaw na ári ka Siria kadakami nga bálud na panda kadedi nga al-algaw. ³³ Nalintag ka kiya nammánis mu kadakami, áta nagbásul kami kikaw, ay kinuwa mu ngala ya rabbang na nga kuwaan

mu kadakami. ³⁴Datu ári mi, se datu ap-apu mi, se datu pappádi, se datu apuapu mi, ay akkan da kinur-kurug ya lin-lintag mu, se akkan da ginì-gìna daya bil-bílin mu, se ya nangag-kagi mu kaggída. ³⁵Ay oray nu aggída kampela ngin nin tu mangitur-turáy kadatu pangiturayán da, se nepassingan mu kaggída ya kinamárum tutu wala, ay se niddán muda ka nalawág se nadam-ag nga lusà, ay akkan da kammala nagsirbi kikaw, se akkan da nigsán datu nadakè a kuk-kuwaan da. ³⁶Ay túya kídi, ay asassu kami kídi nga nadam-ag nga lusà a nengáni mu kadatu apuapu mi, ta senu makakkán da kuma kadaya ápit da kídi se daya duddúma nga napiya nga málà da kídi nga lusà! ³⁷May gapu kadaya bas-básul mi, ay túya daya maápit mi kiya lusà mi, ay mawe kadaya ári nga nippáy mu nga mangituráy kadakami. Ay kuwaan da daya piyán da nga kuwaan kadakami, se kadaya an-animál mi. Ay napalotán tutu wala ngin ya agrig-rígát mi.”

³⁸Ay túya gapu na nga nangwa kami ka kasurátan na sinipataán mi nga iIsrael. Pinirmaán daya ap-apu mi, se daya Levita se pappádi mi.

10 Ay tu dedi datu nagpirma kitu kasurátan: tu gubernador Nehemia nga pútut tu Hacalia, se tu Zedekia; ²datu pappádi, ay tu Seraya, tu Azaria, tu Jeremias, ³tu Pashur, tu Amaria, tu Malkiya, ⁴tu Hattus, tu Shebania, tu Malluc, ⁵tu Harim, tu Meremot, tu Obadia, ⁶tu Daniel, tu Ginneton, tu Baruc, ⁷tu Meshullam, tu Abija, tu Mijamin, ⁸tu Maazia, tu Bilgai se tu Shemaya.

⁹Datu Levita nga nagpirma, ay tu Jeshua nga pútut tu Azania, tu Binnui nga gakagaka natu Henadad, tu Kadmiel, ¹⁰tu Shebania, tu Hodia, tu Kelita, tu Pelaya, tu Hanan, ¹¹tu Mica, tu Rehob, tu Hashabia, ¹²tu Zaccur, tu Sherebia, tu Shebania, ¹³tu Hodia, tu Bani se tu Beninu.

¹⁴Datu ap-apu nga nagpirma, ay tu Paros, tu Pahat-moab, tu Elam, tu Zattu, tu Bani, ¹⁵tu Bunni, tu Azgad, tu Bebai, ¹⁶tu Adonija, tu Bigvai, tu Adin, ¹⁷tu Ater, tu Hezekia, tu Azzur, ¹⁸tu Hodia, tu Hashum, tu Bezai, ¹⁹tu Harif, tu Anatot, tu Nebai, ²⁰tu Magpias, tu Meshullam, tu Hezir, ²¹tu Meshezabel, tu Zadok, tu Jaddua, ²²tu Pelatia, tu Hanan, tu Anaya, ²³tu Hoshea, tu Hanania, tu Hasshub, ²⁴tu Hallohes, tu Pilha, tu Shobek, ²⁵tu Rehum, tu Hashabna, tu Maaseya, ²⁶tu Ahia, tu Hanan, tu Anan, ²⁷tu Malluc, tu Harim se tu Baana.

Tu pinirmaán da nga kasurátan

²⁸ Ay datu duddúma pikam nga iIsrael nga nagpirma, ay datu duddúma nga pappádi, datu Levita, datu guwardiya, datu maragkansiyon, se datu bobonan da kitu Templo, se datu ngámin na summibna kadatu agtangeli nga mag-agyán kitu lusà mi, ta piyán da tu sumúrut kitu lintag ne Dios, se datu attáwa da, datu annánà da, se datu ngámin na makaáwat tin. ²⁹ Ay nagsipata da ngámin se datu ap-apu mi. Nagsipata kami nga surútan mi datu lin-lintag nga nidde ne Dios kitun kitu Moses nga bobonan na, se kuwaan mi ngámin datu bil-bílin ne APU nga Apu tada, se datu ngámin na kagiyan na se ipàwa na. Nu akkan mi surútan datun, ay awátan mi ya kapanísan mi. ³⁰ Ay akkan mi ipalúbus nga mangatáwa daya annánà mi kadaya agtangeli nga mag-agyán ki ili mi. ³¹ Ay nu atán da magláku ki trígo onu oray nágan na ki algaw wa aggiimáng, onu ki napatag ga algaw, ay akkan kami gumátang kaggída. Ay ki káda mekapittu wa dagun, ay akkan mi mulán daya tálun mi, ay se akkan mi yin na singiran daya útáng daya nakaútáng kadakami.

³² Ay sipataán mi pe nga dinnagun kami nga mangidde ka appát grámu nga silber pára kadaya masápul ki Templo naya Dios mi, ³³ nga ummán kadaya sinápay nga dátun ke Dios, se inalgaw nga dátun na trígo, se dátun na masidug, se dátun ki algaw wa aggiimáng, se kiya piyasta ki baru wa búlán, se daya ngámin na masilibráran na piyasta, daya napatag ga dátun, se daya dátun na pakapakawanán daya básul mi nga iIsrael, se daya ngámin na duddúma pikam nga masap-sápul kiya Templo naya Dios mi. ³⁴ Ay káda dagun, ay magbibinnúnut kami se daya pappádi, daya Levita, se daya tolay, ka angammu mi nu nungay na se nu iinna nga pamilya daya mangilbet ka káyu nga medungsu ki altár ne APU nga Dios mi, nga nán na kiya nesúrat ki lintag. ³⁵ Ay sipataán mi nga dinnagun mi nga ilbet ki Templo ne APU daya munna nga ápit mi kadaya tálun mi, se daya munna nga búnga daya ngámin na mul-múla mi nga káyu. ³⁶ Ilbet mi pe kadaya pappádi kiya Templo, daya manákam nga annánà mi nga lalláki, se daya munna annánà daya báka mi, karneru mi se kalding mi, nga ummán kiya nán na ya nesúrat ta lintag. ³⁷ Ikari mi pe nga idde mi kadaya pappádi ki Templo daya arína naya munna nga gáni mi nga trígo, se daya búrás mi kadaya múla mi, se daya básí mi, se ya denu olíbo. Ay ikari mi pe nga idde mi kadaya Levita daya pagkapúlu daya ngámin na maápit mi kadaya

lusà mi, áta daya Levita daya magurnung kadaya pagkapúlu daya ápit da tolay kadaya bar-bariyu mi. ³⁸Daya pappádi nga gakagaka tu Aaron, ay bulunan da daya Levita nga mawe maggalà kada pagkapúlu da tolay. Ay tu pagkapúlu natu maurnung da, ay ippan daya Levita kitu aggurnúngán ka Templo naya Dios mi. ³⁹Ay datu ilIsrael se datu pútut datu Levita, ay ilbet da kiya Templo datu dátun na trigo, básì, denu olíbo, ay se da ippáy kitu aggurnúngán da, nga giyán pe datu aruminta nga usár kiya Templo. Ay ittu pe ya pagyanán daya pappádi nga magsirbi, se datu guwardiya, se datu maragkansiyon.

Ay ikari mi nga akkan mi pagdudoray ya Templo naya Dios mi.

Datu tolay nga nagyán ka Jerusalem

11 Datu apu datu tolay, ay nagyán da ka Jerusalem. Datu duddúma tolay nga nagyán kannán, ay nagbibinnúnut da. Ki káda sangapúlu wa pamilya, ay isa nga pamilya tu nabúnut. Ay datu duddúma ngin, ay nagyán da kadatu duddúma nga il-íli ka Juda. ²Pinatag datu tolay datu duddúma pikam ma maminya nga magyán ka Jerusalem.

³Kaduwán kadatu tolay, datu pappádi, datu Levita, datu bobonan da kitu Templo, se datu gakagaka datu bobonan tu Solomon, ay nag-agyán da kadatu il-íli da kampela ngin nin ka Juda.

Tu idi ya lista datu à-apu kitu probinsiya Juda nga nagyán ka Jerusalem: ⁴Nagyán ka Jerusalem datu duddúma nga tangámalán tu Juda se datu tangámalán tu Benjamin. Datu tangámalán tu Juda, ay tu Ataya nga pútut tu Uzzia, nga pútut tu Zacarias. Tu Zacarias, ay pútut tu Amaria nga pútut tu Shefatia nga pútut tu Mahalalel, nga gakagaka tu Perez; ⁵se tu Maaseya nga pútut tu Baruc, nga pútut tu Col-hoze. Tu Col-hoze, ay pútut tu Hazaya nga pútut tu Adaya. Tu Adaya ya pútut tu Joyarib nga pútut tu Zacarias nga gakagaka tu Shela. ⁶Ya dágup datu gakagaka tu Perez nga lalláki nga nagyán ka Jerusalem, ay 468 da ngámin. Nalaing da ngámin na suldádu.

⁷Ay datu tangámalán tu Benjamin, ay tu Sallu nga pútut tu Meshullam nga pútut tu Joed. Tu Joed, ay pútut tu Pedaya nga pútut tu Kolaya. Tu Kolaya, ay pútut tu Maaseya, nga pútut tu Itiel, nga pútut tu Jeshaya. ⁸Ay datu pampane tu Sallu, ay tu Gabbai se tu Sallai; 928 ngámin datu tangámalán tu Benjamin nga nagyán ka Jerusalem. ⁹Ay tu Joel nga pútut

tu Zicri tu apu da, se tu Juda nga pútut tu Hassenua tu sumarunu kaggína ki sáad kitu íli.

¹⁰ Datu pappádi, ay tu Jedaya nga pútut tu Joyarib, tu Jakin, ¹¹ se tu Seraya nga pútut tu Hilkia nga pútut tu Meshullam. Tu Meshullam ay pútut tu Zadok nga pútut tu Merayot. Tu Merayot, ay pútut tu Ahitub nga pakammuwan da kitu Templo ne Dios. ¹² Kabbulun da datu magsir-sirbi pe kitu Templo; 822 da ngámin.

Ay uwad pe tu Adaya nga pútut tu Jeroham nga pútut tu Pelalia. Tu Pelalia, ay pútut tu Amzi nga pútut tu Zacarias. Tu Zacarias, ay pútut tu Pashur nga pútut tu Malkiya. ¹³ Datu kabbulun tu Adaya, ay datu apu datu pam-pamilya da; 242 da ngámin.

Kabulun da pe tu Amasai nga pútut tu Azarel nga pútut tu Azai. Tu Azai, ay pútut tu Meshillemot nga pútut tu Immer. ¹⁴ Ya dágup datu ngámin na kabbulun tu Amasai nga pabeg nalaing nga suldádu, ay 128. Ay tu Zabdiel nga pútut tu Haggedolim tu apu da.

¹⁵ Datu Levita, ay tu Shemaya nga pútut tu Hasshub nga pútut tu Azrikam. Tu Azrikam, ay pútut tu Hashabia nga pútut tu Bunni; ¹⁶ Ay tu Shabbetai se tu Jozabad nga apu pe datu Levita datu nangiapu kitu ubra da kitu lasi natu Templo ne Apu Dios. ¹⁷ Kabulun da pe tu Mattania nga pútut tu Mica nga pútut tu Zabdi nga gakagaka tu Asaf. Aggína tu mangiapu kitu aggyáman da kitu agkarárag da. Ay tu Bakbukia tu kaseng tu Mattania. Kabulun da pe tu Abda nga pútut tu Shammua. Tu Shammua, ay pútut tu Galal nga pútut tu Jedutun. ¹⁸ Ay 284 ngámin datu Levita nga nagyán kitu napatag nga íli Jerusalem.

¹⁹ Ay datu guwardiya kitu ruwángan natu Templo nga nagyán ka Jerusalem, ay tu Akkub, tu Talmon se datu pampane da; 172 da ngámin.

²⁰ Ay datu duddúma nga ísrael, se datu pappádi, se Levita, ay nag-agyán da kadatu ngáni da nga lusà kadatu il-íli ka Juda. ²¹ Ngamay datu bobonan da kitu Templo, ay nagyán da ka Ofel. Tu Ziha se tu Gishpa datu apu da.

²² Datu apuapu datu Levita nga mag-agyán ka Jerusalem, ay tu Uzzi nga pútut tu Bani nga pútut tu Hashabia. Tu Hashabia, ay pútut tu Mattania nga pútut tu Mica. Tu Uzzi, ay isa kadatu gakagaka tu Asaf. Aggída datu maragkansiyon kitu Templo ne Dios. ²³ Atán kampela ya bílin tu ári yin panggag ki inalgalaw wa ubra datu maragkansiyon. ²⁴ Ay tu Petahia nga pútut tu Meshezabel nga gakagaka tu Zera nga pútut tu Juda, tu agpamutuán natu ári panggag kadatu tolay.

Datu il-íli nga naganán datu duddúma nga tolay

²⁵ Datu duddúma nga tolay ka Juda, ay naganán da kadatu il-íli nga adanni kadatu lusalusà da. Naganán datu tangámalan tu Juda ka Kiriath-arba, Dibon, se Jekabzeel se kadatu bar-bariyu kitúni. ²⁶ Ay nag-agyán da pe ka íli Jeshua, Molada, Bet-pelet, ²⁷ Hazar-shual, se ka Beer-sheba se kadatu bar-bariyu da; ²⁸ Ay uwad da pe datu nawe naganán ka Ziklag, Meconah se kadatu bar-bariyu na, ²⁹ se ka En-rimmon, Zora, Jarmuth, ³⁰ ka Zanoah, ka Adullam se kadatu bar-bariyu da. Ay uwad da pe datu naganán ka íli Lakish se kadatu tal-tálan kitúni, se ka Azekah se kadatu bar-bariyu da. Ay díkod nag-agyán datu tolay ka Juda kadatu ngámin na íli ka Beer-sheba panda kitu tanáp Hinnom.

³¹ Datu tangámalan tu Benjamin, ay naganán da ka íli Geba, ka Micmas, ka Aija, Bethel se kadatu bar-bariyu da. ³² Ay uwad da pe datu naganán ka, Anatot, Nob, Anania, ³³ ka Hazor, Rama, Gittaim, ³⁴ ka Hadid, Zeboim, Neballat, ³⁵ ka Lod, se Ono, se kitu tanáp pa giyán datu nalain mangwa ka panda ngala. ³⁶ Ay datu duddúma nga Levita nga mag-agyán ka Juda, ay nepagyán da kadatu tangámalan tu Benjamin.

Ya listáan kadatu pappádi se Levita

12 Ay tu idi ya lista datu pappádi se Levita nga nagulli nga gayát kitu nangitaláwan da kaggída. Nebulun da kitu Zerubbabel nga pútut tu Shealtiel, se kitu Jeshua nga nangátu wa pádi:

Datu pappádi, ay tu Seraya, tu Jeremias, tu Ezra, ² tu Amaria, tu Malluc, tu Hattus, ³ tu Shecania, tu Rehum, tu Meremot, ⁴ tu Iddo, tu Ginnetoi, tu Abija, ⁵ tu Mijamin, tu Maadia, tu Bilga, ⁶ tu Shemaya, tu Joyarib, tu Jedaya, ⁷ tu Sallu, tu Amok, tu Hilkiah se tu Jedaya. Ay aggída datu ap-apu datu pappádi kitu tiyampu tu Jeshua.

⁸ Ay tu dedi ya ngag-ngágan datu Levita: tu Jeshua, tu Binnui, tu Kadmiel, tu Sherebiah, tu Juda se tu Mattaniah. Tu Mattaniah se datu kabbulun na datu makammu kadatu kansiyon ki panaggiyáman. ⁹ Ay tu Bakbukiah, se tu Unno se datu kabbulun da datu kasinungbát da nu magkansiyon da. ¹⁰ Tu Jeshua tu ama na tu Joyakim. Ay tu Joyakim tu ama natu Eliashib. Tu Eliashib tu ama natu Joyada. ¹¹ Tu Joyada tu ama natu Jonatan. Ay tu Jonatan tu ama natu Jaddua.

¹² Ay kitu tiyampu nga tu Joyakim tu nangátu wa pádi, ay tu dedi datu apu datu pam-pamilya datu pappádi:

tu Meraya tu apu datu pamilya tu Seraya.

Tu Hanania tu apu datu pamilya tu Jeremias.

¹³ Tu Meshullam tu apu datu pamilya tu Ezra.

Tu Jehohanan tu apu datu pamilya tu Amaria.

¹⁴ Tu Jonatan tu apu datu pamilya tu Malluki.

Tu Jose tu apu datu pamilya tu Shebania.

¹⁵ Tu Adna tu apu datu pamilya tu Harim.

Tu Helkai tu apu datu pamilya tu Merayot.

¹⁶ Tu Zacarias tu apu datu pamilya tu Iddo.

Tu Meshullam tu apu datu pamilya tu Ginneton.

¹⁷ Tu Zicri tu apu datu pamilya tu Abija.

Ay uwad pe ya apu datu pamilya tu Miniamin.

Tu Piltai tu apu datu pamilya tu Moadia.

¹⁸ Tu Shammua tu apu datu pamilya tu Bilga.

Tu Jehonatan tu apu datu pamilya tu Shemaya.

¹⁹ Tu Mattenai tu apu datu pamilya Joyarib.

Tu Uzzi tu apu datu pamilya tu Jedaya.

²⁰ Tu Kallai tu apu datu pamilya tu Sallai.

Tu Eber tu apu datu pamilya tu Amok.

²¹ Tu Hashabia tu apu datu pamilya tu Hilkia.

Tu Netanel tu apu datu pamilya tu Jedaya.

²² Ay uwad listáan kadatu apu datu pam-pamilya datu Levita, se datu pappádi kitu tiyampu dedi nga nangátu wa pappádi: tu Eliashib, tu Joyada, tu Johanan se tu Jaddua. Nabalín tu listáan kitu nagturáy tu Darius nga ári ka Persia. ²³ Nelista datu ngag-ngágan datu apu datu pam-pamilya datu Levita panda kitu tiyampu tu Johanan nga apúku tu Eliashib. ²⁴ Ay tu dedi datu apu datu pam-pamilya datu Levita:

Tu Hashabia, tu Sherebia, tu Jeshua, tu Binnui, se tu Kadmiel. Uwad pe datu kabbulun da nga kasinungbát da nu magkansiyon da kitu panagdáyaw da se panaggiyáman da ke Dios, nga ummán kitu nebílin tu David kitun nga bobonan ne Dios.

²⁵ Ay tu dedi datu magguwardiya kadatu aggippayán da kadatu kuw-kuwa se aruminta kitu Templo nga adanni kitu ruwángan na:

Tu Mattania, Bakbukia, Obadia, Meshullam, Talmon se tu Akkub.
²⁶ Nagsirbi dayán kitu tiyampu tu Joyakim nga pútut tu Jeshua nga apúku tu Jozadak. Tu Nehemia tu gubernador kitun, se tu Ezra tu mangisur-súru kitu lintag ne Dios.

Tu nangididikár da kitu darupírip pa abut tu íli

²⁷ Ay kane ididikár da tu baru wa darupírip pa abut tu Jerusalem, ay inayabán da ngámin datu Levita nga atán kadatu nagbal-baláki nga íli, nga magkan-kansiyon se magtuk-tukár kadatu arpa, gansa, se líra, kitu aggan-gánas se aggiyáman da. ²⁸ Ay naglalbet ngámin pe datu Levita nga maragkansiyon, nga mag-agyán kadatu il-íli kitu lebut Jerusalem. Uwad pe datu naggayát kadatu il-íli ka Netofa, ²⁹ ka Bet-gilgal, se kadatu bar-bariyu ka Geba, se Azmavet, áta atán nala kitu lib-lebut na Jerusalem datu babalay da. ³⁰ Ay tu nunna nga kinuwa datu pappádi se datu Levita, ay tu nagdalus kadatu baggi da, ay se yala kadatu tolay, ay se kitu ruwáangan, se kitu darupírip pa abut tu íli.

³¹ Ay se kami ya ummunè se datu ap-apu na Juda kitu útun tu darupírip pa abut. Ay se kuda pinagkaduwa ka abay ya grúpu nga magiyáman se mawe mangliput kitu útun tu darupírip. Ay tu isa nga grúpu, ay nameyag da ka pane diwanán nga mameyag kitu ruwáangan na giyán na aggippaán ka gamà. ³² Umun-unud kaggída de Hoshaya se tu gudduwa kadatu ap-apu ka Juda. ³³ Nebulun kaggída tu Azaria, tu Ezra, tu Meshullam, ³⁴ tu Juda, tu Benjamin, tu Shemaya, se tu Jeremias. ³⁵ Ay se yala datu duddúma nga pappádi nga magtar-tarumpeta. Ay se yala sumarunu tu Zacarias nga pútut tu Jonatan se apúku tu Shemaya. Tu Shemaya, ay pútut tu Mattania. Tu Mattania, ay pútut tu Micaya. Ay tu Micaya, ay pútut tu Zaccur nga gakagaka tu Asaf. ³⁶ Ay se yala sumarunu datu kabbulun tu Zacarias nga de Shemaya, Azarel, Milalai, Gilalai, Maai, Netanel, Juda se tu Hanani. Sikkiikkam da ngámin kadatu ittutukár tu David kitun na bobonan ne Apu Dios. Tu Ezra tu nagin-inunna kaggída. ³⁷ Ay kane makadatang da kitu ruwáangan na nga nengágan ka Gabbuwà, ay umunè da kitu agdán kitu darupírip nga mawe kitu íli tu David. Liniwánan da tu palásiyu tu David, ay se da nameyag kitu nengágan da ka Ruwáangan Danum nga atán ka pane lattakán.

³⁸Ay tu isa nga grúpu datu magkan-kansiyon na magiyáman, ay nameyag da ka pane kasígid kitu útun tu darupírip. Ummunud kami kaggída se datu gudduwa datu tolay. Lumíwán kami kitu Torre nga Aglutuwán ka Sinápay, se kami nameyag kitu Nalawág nga Darupírip. ³⁹Ay se mi liniwánan tu Ruwáangan Efraim, se tu Ruwáangan na Dadán, se liniwánan mi pe tu nengágan ka Ruwáangan Sissida, se tu Torre Hananel, ay se kitu Torre Magatut. Ay se kami la nawe kitu Ruwáangan Karneru, ay se kami namanda kitu Ruwáangan da Guwardiya.

⁴⁰Ay datu duwa nga grúpu nga maragkansiyon nga magiyáman ke Dios, ay nangaw-át da kitu Templo, kitu pagyanán da kampela ngin nin. Nangaw-át tà pe, kabulun ku tu gudduwa kadatu ap-apu, ⁴¹se datu pappádi nga magtar-tarumpeta; tu Eliakim, tu Maaseya, tu Miniamin, tu Micaya, tu Elioenai, tu Zacarias se tu Hanania. ⁴²Kabulun ku pe datu maragkansiyon; tu Maaseya, tu Shemaya, tu Eleazar, tu Uzzi, tu Jehohanan, tu Malkiya, tu Elam se tu Ezer. Ay kinggat da tutu wala tu nagkansiyon. Tu Jezrahia tu apu da. ⁴³Adu tutu wala datu nedátun da kitun na algaw se naganggam da, ta e Dios tu namaanggam tutu wala kaggída. Nepaganggam pe datu babbay se datu annàna. Magina tu agganggam datu tolay ka Jerusalem oray ki adayyu.

⁴⁴Ay kitun kam ma algaw, ay namíli da kadatu lalláki nga makammu kadatu aggurnúngán da kadatu iddanán datu tolay, ummán kadatu munna nga ápit da, se datu pagkapúlu da. Ay aggída datu natudinán na magurnung kadatu dátun na maggayát kadatu tal-tálun kadatu il-íli, se datu idde da tolay pára kadatu pappádi se datu Levita nga nán tu lintag ne Dios. Ata naangammán datu iJuda kadatu Levita se kadatu pappádi kitu ubra da, ⁴⁵gapu ta tinungpál da tu bílin ne Dios panggap ki panagdalus se datu duddúma nga ipàwa na. Ay ummán pe datu maragkansiyon se datu guwardiya; kinuwa da tu ubra da nga ummán kitu nebílin tu David se tu Solomon nga pútut na. ⁴⁶Ata nanggayát kam kitu tiyampu tu Ari David se tu Asaf kitun, ay uwad da apu datu maragkansiyon, se uwad pe datu kan-kansiyon nga pagdáyaw se aggiyáman ke Dios. ⁴⁷Ay kitu tiyampu de Zerubbabel se tu Nehemia, ay inalgaw wa nagidde datu ngámin iIsrael ka ságut da kadatu maragkansiyon, se kadatu guwardiya kadatu ruwáangan tu Templo, se kadatu Levita. Ay datu Levita, ay nidde da kadatu pappádi nga pútut tu Aaron datu masápul mengáni kaggída.

Nesibna datu agtangeli kadatu iIsrael

13 Ay kitun kam nga algaw, kane mebása datu lin-lintag kitu libru tu Moses kadatu tolay, ay nammuwán da nga akkan mabalin datu iAmmon, se datu iMoab nga meráman kitu panaggigímung datu tolay ne Dios. ²Ata akkan niddán datu iAmmon se iMoab datu iIsrael ka makkán se mainum kitu nannalen da kitu giyán da kitu nagtálaw da ka Egipto. Tinangdánan da mán kammin tu Balaam nga magged kaggída. Ngamay pinagbalin ne Dios tu nagged da ka nagkapiyaán da. ³Ay kane magína datu tolay tu lintag nga nebása, ay pinatálaw da datu agtangeli kitu babalay datu iIsrael.

Datu kinuw-kuwa tu Nehemia

⁴Ay sakbay ya nàwa yán, ay napiya tu agbulun tu Eliashib nga pádi se tu Tobia. Tu Eliashib tu pakammuwan da kadatu kuwartu nga aggipayán da kadatu masap-sápul kitu Templo. ⁵Ay tútu pinalubúsán na tu Tobia nga usaran na tu abay nga kuwartu kitu Templo. Ay tun na kuwartu tu aggipayán da kitun kadatu dátun na trigo, insensu, se datu aruminta kitu Templo, se datu pagkapúlu wa trigo, básí, se denu olíbo. Ittu datun datu dátun na id-idde da kadatu Levita, se kadatu maragkansiyon, se kadatu guwardiya kitu ruwángan tu Templo. Atán pe kitúni tu dátun na id-idde da kadatu pappádi. ⁶Ay áwan nà kitun ka Jerusalem kitu nekàwa datun, ta nawe yà ka giyán tu Artaserses nga ári ka Babilonia kitu mekatallu púlu se duwa dagun kitu panaggári na. Akkan nabayág, ay nakipalúbus sà kaggína ⁷nga magulli kammin ka Jerusalem. Ay ittu tun tu nakammu ku nga niddán tu Eliashib tu Tobia ka kuwartu na kitu Templo ne Dios. ⁸Ay nakarungat tà tutu wala, ay tútu nippaán ku kitu kuwartu datu ngámin na sanikuwa natu Tobia. ⁹Ay se ku pinadalusán datu kuwartu, se ku nepatulli kammin datu ar-aruminta natu Templo, se datu dátun na trigo, se datu insensu.

¹⁰Ay se ku la nammuwán pe nga akkan da ngin id-idde kadatu Levita se kadatu maragkansiyon datu ngáni da kuma gapu kadatu ub-ubra da kitu Templo. Ay tútu nagguulli da kadatu tal-tálun da. ¹¹Ay tútu inal-alnganán ku datu ù-upisiyál, nga nán ku kaggída, “Tura nu wa pinagdudoray ya Templo ne Dios?” Ay se ku wala pinagulli kammin datu Levita se datu

maragkansiyon kitu ubra da kitu Templo. ¹² Ay se yala nagilbet manin datu tolay kadatu pagkapúlu da nga trígo, bási, se denu olíbo. Ay se da inurnung kammin datun kitu aggipayán kitu Templo. ¹³ Ay se ku pinatagasinnán kitu Shelemia nga pádi, se kitu Zadok nga misturu ka lintag, se kitu Pedaya nga isa nga Levita datu kuwartu wa aggipayán kadatu kuw-kuwa kitu Templo. Inalà ku nga kaseng da tu Hanan nga pútut tu Zaccur nga apúku natu Mattania. Dayán na tolay, ay mapiyár da. Aggída datu makammu nga mangidde kadatu kasapúlán datu kabbulun da nga magub-ubra. ¹⁴ Nagkarárag gà a nán ku, “O Dios ku, damdammam agpà daya ngámin na kinuw-kuwa ku pára ki Templo, se ya panagdáyaw kíkaw kiyán.”

¹⁵ Ay kitun na algaw, ay nasingan ku datu iJuda nga magpaggat ka úbás da ki algaw wa aggiimáng. Ay datu duddúma, ay uwad da nga mangitakay kadatu trígo da, se datu bási da, se datu úbás da, se datu gígus da se datu duddúma nga agtu da kadatu asnu da, ta ippan da ka Jerusalem kitu algaw wa aggiimáng. Ay tútu kinagiyánan kuda nga kannaw ya magláku kadaya akakkanan ki algaw wa aggiimáng. ¹⁶ Ay uwad pe datu lalláki nga iTyre nga mag-agyán ka Jerusalem nga nangilbet ka sissida se kadatu duddúma nga tagiláku da, ay se da iláku kadatu iJuda se iJerusalem ki algaw wa aggiimáng. ¹⁷ Ay tútu inal-alnganán ku datu ap-apu ka Juda, nga nán ku, “Nágan na kuk-kuwaan nu? Akkan nu agkà ammu nga nadakè yán ta? Tura nu kuwaan nin ka ur-úray nga algaw ya algaw wa aggiimáng?” ¹⁸ Di nu wa ammu, nga ummán kiyán tu kinuwa datu apuapu nu, ay tútu pinánis ne Dios da? Akkan nu ammu nga gapu kiyán, ay túya nidde ne Dios dedi ngámin na kapar-parigátan tada? Ay kídi, ay turunan nu ya rungat ne Dios kadàta nga iIsrael ki akkan nu anngipatag ki algaw aggiimáng!”

¹⁹ Ay se ku nebílin na gipán da datu ruwárgan na Jerusalem nu maggì-gìbat tin kiya anggayát naya algaw wa aggiimáng. Ay se da ngala ilukát manin nu mabalin ya algaw wa aggiimáng. Ay se ku pinaguwardiyaán kadatu tolay ku datu ruwárgan, ta senu áwan mangilnà ka tagiláku na ki algaw wa aggiimáng. ²⁰ Ay díkod datu maglà-láku se datu maggà-gátang, ay namissán onu namidduwa da nagidda kitu lasi na Jerusalem kitu gabi. ²¹ Ngamay kinagiyánan kuda nga nán ku, “Tura kayu magidda kiya lasi na darupírip? Nu kuwaan nu manin yán, ay tiliwan takayu!” Ay nanggayát kitun, ay akkan da ngin inumbet kitu algaw aggiimáng. ²² Ay

se ku binílin datu Levita nga dalusán da datu baggibaggi da, ay se da nga guwardiyaán datu ruwáangan, ta senu ipatag da tolay ya algaw wa aggiimáng. Nagkarárag gà pe nga nán ku, “Damdammam agpà, O Dios ku, ya napiya nga kinuwa ku! Kalakkán nà agpà gapu ki kinaabay naya áwan kaul-ulissán na aminya mu.

²³ Ay kadatun pe nga tiyampu, ay nammuwán ku nga atán datu Judyu nga nangatáwa kadatu babbay ka Ashdod, Ammon se Moab. ²⁴ Ay tu gudduwa kadatu annánà da, ay tu úni ka Ashdod tu aggúni da, se datu aggúni datu duddúma nga tolay. Akkan da ammu tu magúni ki aggúni ka Juda. ²⁵ Ay tútu inal-alngán ku datu lalláki, se kuda ginedán, ay se kuda sinaplit, ay se kuda pinúngupúngut. Ay se kuda pinagsipata ki ngágan ne Dios nga akkan da mangatáwa, se akkan da ipalúbus nga mangatáwa daya annánà da kadatu annánà datu agtangeli. ²⁶ Ay nán ku pe kaggída, “Akkan nu ammu ta, nga ittu yán ya gapu na nagbasúlán tu Ari Solomon kitun? Awan ári nga ummán kaggína ki ngámin kalawagán. Pà-pàgan ne Dios, ay se na pinagári ki ngámin Israel. May nagbásul gapu ki angiparò datu attáwa na nga agtangeli. ²⁷ Ay wayya mikayu wala nga taldan kiya nadakè tutu wala nga kuk-kuwaan nu? Sinuwáy nu we Dios tada kiya angngatáwa nu kadaya agtangeli nga babbay?”

²⁸ Ay tu isa kadatu lalláki nga pútut tu Joyada nga pútut tu Eliashib nga nangátu wa pádi, ay inatawán na tu an-anà tu Sanballat nga iHoron, ay tútu pinatálaw ku. ²⁹ “Akkan muda agpà kaligpanán O Dios, ta rinag-ragitán da ya kinapádi da, se kinaligpanán da ngin tu sinipataán da nga pappádi se Levita.”

³⁰ Ay díkod neadayyu ku ngámin daya tolay kadaya mamaragit kaggída nga gayát kadaya agtangeli. Ay nangwa ngà pe ka pagannurútán datu pappádi se Levita kadatu ubra da. ³¹ Ay sinigurádu ku pe nga atán peyang káyu wa medungsu kitu anidúgán kadatu dátun, ay se ilbet datu tolay datu munna nga ápit da kadatu mul-múla da.

Nagkarárag gà a nán ku, “O Dios ku, damdammam agpà ngámin dedi, ay se nà a subalítán.”